

## 剑滩杨氏十修谱序

星移斗转，物竞天华。思家族之繁衍，慨古今之变迁。故先人作族谱传之，以详其源而明其本，俾使亲疏可辨，尊卑有别，恩义常感，族谊长存。

我杨姓氏族，受姓自三封杨国，展猷于四袭诸侯。居金陵，遣豫章。兆应三鱣，位擢三公。金畏四知，阁著四香。德行道义，已然显耀前朝；气节文章，皆得流传后世。虽代远时殊，支分脉散，终是水之万派，发于一源；木之千枝，归于一本。

考吾剑滩杨氏一支，始于南唐侍郎轺公，传子云拔公，至唐同光二年，有孙镇科公自豫章迁湘邑剑滩而居焉。其地于智峰之侧，祥云流荡乎天际；凤岭之隈，屋舍鳞次于碧原。平畴万顷，溉剑水之清波；佳木千寻，凝鱼山之紫气。瓜瓞绵延，祥开四十八门之裔冠；椒条蕃衍，萃拔百千万户之子孙。

昔者，吾族德隆先生辛酉岁自台归湘，敬宗收族，重义疏财。克已倾囊，复鱼山之祖墓；立碑勒石，聚合族之人心。又吾族正根诸君，知祖墓护守，兹事体大；行香火祭祀，合族心同。自兹之后，多谢明时惠政，千年古墓重光。乃知杨家本色，唯有精忠；族众丹心，重于清白。不慕

浮华之虚，克行忠诚之实。崇文重教，承延国粹菁华；抱朴怀仁，吞吐胸襟浩瀚。族人登鱼山以容与，引千秋之遐想；缘磴道而徐徂，思远祖之高贤。是时也，身履其境，神游物外，仰祖德之心，慕族贤之意，油然而生矣。

与祖陵同重者，族谱也。夫谱者以稽世系，以贻后嗣。癸酉岁吾剑滩杨氏九修谱牒，德隆先生会同稽尧、耿初、东堂、立珊、兴安诸族贤，洞察细微，拟章程以为纲目；宵旰劳碌，定篇幅而成谱书。条分根系之繁衍，缕析门派之流播。欧调苏叙，劳神格外；殚精竭虑，不负重托。可谓名满宗亲而功在千秋者也。

时隔卅载，谱启十修。正根、贡湘、楚凡、水清、建华诸君不辞劳苦，上溯本根，志在承先；下清枝叶，意图启后。合族子弟亦饮水思源，尊祖敬宗，各捐钱财，以为墨资。尤赖湖南省炎黄文化研究会常务副会长岳平女史、湖南省杨氏文化研究会秘书长金波先生旁搜远绍，广寻慎采。适逢冬日日暖，有劳岳平女史联络陪同，吾族正根、贡湘、建华、克辉、林志、三保、冰锋等一众族亲，远赴江西吉水寻根。于是乎捐俗虑、拂尘襟、怀夙愿、荐虔诚。三沐三薰，祇奉心香一瓣；毕恭毕敬，拜谒祖莹总祠。继而细考舆图，正文字之讹错；详证年月，辟阙疑之错乖。历寒暑三载，得竣谱事。观吾族新谱，支分派别，衍叙周详；昭穆伦次，厘然可读。敬诸君事功至伟，

感族人合力同心，虽未臻尽善尽美之境，则已上不负前贤而下无愧后人矣。

今正根族长嘱予为序。予秉性憨慵，才疏学浅，辞之再三。时岳平女史劝勉予曰：合力修谱，乃尊祖敬宗之大事，既为族亲，义不容辞。予以大义迫，勉为其难，尽绵薄之力，聊陈数语，以承祖训而昭后人。

呜呼！传家乘，睦族邻，敬执事，兴家邦，子子孙孙勿替，是使忠孝与惠政互渗，蒸黎共家国同荣，则吾杨氏一族发达昌盛，千秋万代可期也。是以为序。

中国楹联学会常务理事

湖南省楹联家协会副主席

癸卯腊月之吉 受二公裔孙 克辉 谨撰

于三港咀